

船山遺書

第四函
函六冊

禮記章句卷十七

衡陽王夫之譔

少儀

少詩
照反

此篇記少事長賤事貴之禮朱子所謂小學之支流餘裔也與曲禮內則相爲出入閒有互見者凡四十五章

開始見君子者辭曰某固願聞名於將命者不得階主

見賢遍反下同
名之聞亡運反

聞記者述其所傳聞之辭君子有齒爵之稱固誠也聞名猶言通名階上進之意主主人也稱將命者以己卑少不敢自進於主人也

敵者曰某固願見

敵者齒爵相當也得以階主不稱將命者矣

罕見曰聞名亟見曰朝夕瞽曰聞名

聞亡運反
亟去吏反

罕見久離而復相見也亟數也於尊者稱聞名敵者稱見其階主與否亦因其等瞽則雖敵亦稱聞名以目無見辭不虛也

適有喪者曰比童子曰聽事適公卿之喪則曰聽役於司徒

適有喪謂弔也比者比次年力供喪事也童子不能任事聽使令也司徒有大喪則帥衆庶屬六引而治其政令周禮無家司徒公卿之有司徒春秋以降之僭也弔而稱比役者哀不虛致必有事也

君將適他臣如致金玉貨貝於君則曰致馬資於有司敵者曰贈從者

從疾用反

適他謂朝會貨泉布貝海中介蟲古者以其甲爲貨今雲南人猶然馬資謂芻秣之費敵者卿大夫之自相贈也

臣致襚於君則曰致廢衣於賈人敵者曰襚親者兄弟不以襚進

賈居訝反

廢之爲言置也猶尊之有廢尊謂委致於地不以卽陳也賈人玉府之屬吏主知物賈凡獻金玉文織貨賄者玉府受而藏之物微不敢當玉府之藏稱其屬吏也親者兄弟謂大功以上進執以將命也親者之襚自以卽陳至親無文不將命也

臣爲君喪納貨貝於君則曰納甸於有司

爲于僞反

納貨貝者賻也甸田也謂納其采邑之田賦也

右第一章 此章皆記將命之辭蓋少而習之以爲終身之節

賵馬入廟門賻馬與其幣大白兵車不入廟門

知死者賵陳車馬以送葬也知生者賻賻助也助主人之喪用也廟門祖廟大門殯朝於祖而賵馬入陳爲行飾也賻之馬幣非爲死者不入陳也大白革路所建之旗兵車革路也諸侯之葬諸路皆駕鄰國得以賵焉然兵車非容之盛者雖賵亦不入廟惟金路玉路象路則入革路不入則木路亦可知矣賻者旣致命坐委之擯者舉之主人無親受也

謂賻幣也委置於地也舉受而藏之也主人哀戚不在貨財故賓不親授主不親受

右第二章 此章記賵賻之節蓋因上章而次及之

受立授立不坐性之直者則有之矣

受立授立謂尊者方立而已與受授也坐跪也不坐者重煩尊者俛也生質曰

性直者謂龜胸不能俛者有之謂或坐蓋受授雖不坐猶必俛躬承奉惟形質不能俛者則嫌於寡岸雖坐可矣

右第三章

始入而辭曰辭矣卽席曰可矣

擯者辭也使賓主均齊中節無參差也

排闥說屨於戶內者一人而已矣有尊長在則否

說他活反
長丁丈反

排闥開戶扇向壁爲隱蔽以說屨也衆賓皆敵猶必有長故一人說屨於戶內示有所尊餘皆說於堂下若先有尊長在室則皆說於外無二尊也

右第四章

問品味曰子亟食於某乎問道藝曰子習於某乎子善於某乎

亟去吏反

亟數也數食之則嗜可知不斥言嗜嫌從欲也道者教之綱藝六藝也道言習道不易善也藝必善而後謂之藝也不以能否爲問嫌量其短

右第五章

不疑在躬

疑質問也君子內省而察言觀色不以己之品詣爲疑而問之嫌要譽也

不度民械

度徒洛反

民人也械器物也不揣度人資生之器物而計其貧富嫌於伎求也

不願於大家

願歆羨大家富室也不樂道大家而歆羨之所貴者德爾

不訾重器

訾將此反

訾毀議重器宗廟之器也人之所世守而以奉先雖不精好不當訾也四者皆

慎言之要

右第六章

汜埽曰埽埽席前曰拊拊席不以蠶執箕膺搗

汜孚范反口埽之埽蘇老反餘先到反拊方問反搗與搯反

汜埽徧埽一室也拊與糞通除也蠶帚芒簇出如馬蠶席前但以帚拂去餘

食不使蠶端塵垢汚席也膺胸也搗箕舌也執箕捐塵以舌內向不使或觸

賓長

右第七章

不貳問

問卜筮也貳者雜以二事則黷神矣

問卜筮曰義與志與義則可問志則否

與以諸反

問卜筮太卜問來卜筮者也可問爲之卜筮也事或有須密者不能直告當質其爲義爲志若非義之志而不可顯言則其爲逆慝可知不爲之間以折姦且遠害也

右第八章

尊長於己踰等不敢問其年

長丁丈反

尊以爵言長以分言年非其等者雖少不齒問年則嫌於齒之也

燕見不將命

亟見者一將命而止後此則爲燕見將問道業不敢爲賓

遇於道見則面不請所之

見賢偏反

見謂尊長見之趨前相覲曰面不見己則不面恐煩應接不請所之者尊長所事非所敢與也

喪俟事不恤弔

恤與特同

隨尊長而至喪者之家不敢爲賓

侍坐弗使不執琴瑟不畫地手無容不翣也

畫胡麥反俗讀胡化反者非

使命之鼓琴瑟也畫地有所稱說而指畫也容張拱也不拱者以俟指使扶掖也翣扇也

寢則坐而將命

尊長或有疾而寢將命必坐以俯就之

侍射則約矢侍投則攤矢勝則洗而以請客亦如之不角不擢馬

凡射二人爲耦先倚矢於楅二人更相讓拾取矢約矢者不拾取待尊長取四矢竟而後己總取之也投投壺也攤矢者尊長委矢於地更取而投之己則總

四矢攢握以俟投也勝謂己勝也凡射與投不勝者自取醵立飲今與尊長爲耦而已勝不敢令其自飲洗爵以請若行觴然客云者謂非鄉射大射因燕而以射娛賓也亦洗以請尊賓也角觥也所以示罰尊長不勝爵而不角不敢施罰也馬者投壺之算投壺之禮賓客各爲朋每耦勝則立一馬三馬而成勝遂行慶爵若一朋得二馬一朋得一馬則擢取一馬者之馬歸二者以成三馬卑少者與先生爲耦己朋雖得二馬不敢擢取先生之馬以受慶也

右第九章

執君之乘車則坐

執總握六轡頓馬而不行也乘車別於兵車之稱凡御者必立今以君未升車駐車而俟故坐而執轡不敢迫君升也

僕者右帶劍負良綏申之面拖諸臂以散綏升執轡然後步

僕御也右帶劍者凡帶劍於左便右抽之御者居中君在左故右帶以避君也良綏君所執以升車者負者舉而加諸左肩申之面者繞右腋出於前也臂覆

苓席也拖諸臂者委緒餘於臂便授君也散綏御所執者謂初升時步行也御者既升執策分轡行車馬五步以調馬乃駐而待君升也

右第十章

請見不請退

召而至事竟則請退若請見而更請退則進止皆自由矣

朝廷曰退燕遊曰歸師役曰罷

明直
遙反

朝廷以近君爲榮入爲進出爲退燕遊樂不可極以家爲主返爲歸也師役不

得已之事以休罷爲幸罷者心力皆釋之辭君子之於言無所苟也蓋如此

侍坐於君子君子欠伸運笏澤劍首還屨問日之蚤莫雖請退可也

還似宣反
莫漢故反

運轉弄之也澤摩拭之也劍首劍柄端鑲可也云者謂雖請見不妨請退也

右第十一章 此章總記見君及尊長而退之通禮

事君者量而后入不入而后量凡乞假於人爲人從事者亦然然故上無怨而下

遠罪也

爲于僞反
于怨反

量而后入不輕仕也入而后量則菲薄其君而吝於忠矣乞求也假借也量其許而後往也爲人從事任人之事不旣任而量其不足與行持兩端也上謂己居人上所乞假從事或己之卑幼也下謂事君而爲臣

右第十二章

不窺密不旁狎不道舊故不戲色

道徒到反

密謂僻處密語及所藏書疏也旁狎者對賓長而與侍坐者相狎昵也道說也舊故往事也稱說昔所經歷以形今之不然人所不信徒取憎厭也戲色戲見於色戲之虐者也戒此四者以與人交然後人敬而悅之

右第十三章

爲人臣下者有諫而無訕有亡而無疾頌而無譏諫而無驕怠則張而相之廢則埽而更之謂之社稷之役

相息亮反更古行反

下謂屬吏訕背譏也亡去也疾怨也巧言以頌曰譏氣矜以諫曰驕君心荒惰曰怠張者勸令勤敏相助也法度圯壞曰廢埽去弊也更興利也安君以安社

稷而非爲容悅則爲社稷役而非爲君役也

右第十四章

毋拔來毋報往

拔蒲撥反
報芳遇反

拔報皆急疾之意來猶就也往猶去也君子之與人交慎於始而不輕絕之不疾爲向背也

毋瀆神

瀆猶辱也祭其所當祭而以時則不煩辱矣

毋循枉

循由也循義以行不枉道以速獲也

毋測未至

未至之事聽理勢之所自至君子盡其常而先覺不以私意測度之

士依於德游於藝工依於法游於說

藝所以廣其德說所以精其法也非是不以之亂其恆業

毋訾衣服成器毋身質言語

服器已成而訾毀之不及事而徒損也質證也聞言而不遽爲傳說可免於質矣莊子曰傳其常情無傳其溢言則幾乎全意亦近此

右第十五章 此章所言皆淺近之事而能慎乎此則亦修身之切務學者不可以其易而忽之也

言語之美穆穆皇皇朝廷之美濟濟翔翔祭祀之美齊齊皇皇車馬之美匪匪翼

翼鸞和之美肅肅雝雝

濟子禮反雝與
駢同芳德反

言語辭命也穆穆旨意深遠皇皇辭氣昌大也濟濟出入均齊翔翔容止各得貌齊齊整肅皇皇敏也車馬謂戎車美御之善也匪匪行不止貌翼翼輕捷貌鸞和謂乘車行有節則鸞和之聲調肅肅清也雝雝和也

右第十六章

問國君之子長幼長則曰能從社稷之事矣幼則曰能御未能御問大夫之子長幼長則曰能從樂人之事矣幼則曰能正於樂人未能正於樂人問士之子長幼

長則曰能耕矣幼則曰能負薪未能負薪

長丁丈反

此與曲禮所記小異皆使者對客之辭也未能其尤幼者也御侍也謂侍君也樂人大司樂教國子也從事藝已成而可試於用也正就正初入學也

右第十七章

執玉執龜筮不趨堂上不趨城上不趨

筮楚革反

城上趨則惑衆

武車不式介冑者不拜

武車兵車介冑之士肅擣而已

右第十八章

婦人吉事雖有君賜肅拜爲尸坐則不手拜肅拜爲喪主則不手拜

雖本惟字之誤

吉事周禮所謂吉拜也拜而後稽顙謂之吉拜齊衰不杖期以下拜賓則然以別於三年服之凶拜也異於男子者男子頓首而後稽顙也肅拜若今揖然低頭下手而不及地婦人以肅拜爲正惟於疏喪而拜君賜則然爲尸爲祖姑之

尸也手拜周禮所謂空首拜而頭至手也婦人以手拜爲重尸道尊故但肅拜爲喪主爲主婦也不手拜者稽顙而後拜其拜也亦頓首而不空首哀至無容也

葛經而麻帶

婦人卒哭之後易首經以葛而要不變婦人重要有除無變

右第十九章 按此章記婦人之禮而繫之少儀者婦人行禮亦男子爲之詔相學禮者所當習也

取俎進俎不坐

取俎者俎陳於阼階西取而執之以升也進俎設於席前也設俎在降神之先未接神不虛敬也

右第二十章

執虛如執盈入虛如有人

執虛虛器也入虛虛室也誠慤端慎之心盡於己而不因於物乃學者存心主

敬之要也

右第二十一章

凡祭於室中堂上無跣燕則有之

室中饋食之事堂上朝踐之事跣脫屨也屨賤不升於堂故升堂則跣祭者將事奔走務於敬敏不可以跣故雖升堂入室不脫屨也惟燕禮獻酬畢畱賓飲酒則脫屨升席曰有之者謂如獻酬時亦無跣也

右第二十二章

未嘗不食新

嘗薦新於寢廟也人子之心不忍先親也

右第二十三章

僕於君子君子升下則授綏始乘則式君子下行然後還立

還似宣反

君子兼君卿大夫而言非僕者之敵也升下或升或下也授者以手持而引之也僕升在君子之先故始乘必式以敬俟之下在君子之後待君子之步行然

後下還向外待君子去遠乃驅車而退

乘貳車則式佐車則否貳車者諸侯七乘上大夫五乘下大夫三乘

乘貳之乘如字餘繩證反

朝祀之副車曰貳戎獵之副車曰佐凡副車皆令人攝乘之兵車不式故乘佐車不式也其式者以非己所得乘必恭敬以明有奉也周禮貳車公九乘侯伯七子男五此言七者舉其中而言之上大夫者天子之卿下大夫者天子之大夫凡貳車皆如其命數卿當六乘大夫當四乘此言五言三舊說以爲殷制蓋降殺以兩之義也

有貳車者之乘馬服車不齒觀君子之衣服服劔乘馬弗賈

賈居訝反

有貳車者謂大夫以上尊者也乘馬服車謂其馬方服車時也服劔所佩劔也弗賈者不敢評其良楮

右第二十四章

其以乘壺酒束脩一犬賜人若獻人則陳酒執脩以將命亦曰乘壺酒束脩一犬